


OTTHUKULA EPHIRO

 Muhiileliwa, apatthani. Nto Apwiya yooreeriheni vanci-ene. Ni kooxukhuru, Munna Neville, mwaha wa moonelo ntoko owo. Nkireere otteeliwa murima otthikela otapernakulu ohiy'ula, mmutekoni mwa Pwiy'ahu oottottopeliwa, ni owoona apatthan'ihu, ohiy'ula, omukokhorela Yoowo ni hiyo.

² Eyo vekeekhai oreeriwa wuulupale okumana-tho epantt'ila nno Orwa w'Apwiya. Nto numala woona, wiiwa, anci-ene orowa, voohiweherereya, naanaanoru, hiyo ninooxanka paahi, okathi p'ukathi, t'ani onttharelana. Masi, nirine-ene nrromel'ola wooreerihwa, wira vakhala. . . "khiivo enwerya onimwalaniha n'uphenta wa Muluku ori mwa Kristu. Khuuvo okhwa, hata—hata vano, nnakhala ohoolo, wala owerya, onwerya onimwalaniha n'uphenta wa Muluku ori mwa Kristu Yesu." Ni nisuwelaka ela, wira, "Emp'ela ya vathi yakurumuwa vale, nookhalana ekina ennilipelela." Oohilipa, owiiniwa murima; ni nimmumula mwa nrromelo yoowo woovuwexa.

³ Miyo kaalavula n'amwaar'aka, ni Muhano Wood n'akina, paahi. . . kahokolowa vale. Kaahimya wira, "Ahe, enkhala paahi ntoko mukwaha ni mukwaha, ni nipuro ni nipuro, masi, nnakhala vo, sinkhala soovuwexa. Ni miyo. . . nisuwelaka wira nimphiya woomalelani, wo—wo—wookhuvealani w'Orwa w'Apwiya." Miyo kiirale, "Ahe. . ."

⁴ Kaalavula ni mwan'aka, nirwaaka mphironi nihiku nlo, naarwa nikhumaka Sioux Falls, oDakota w'Okuusini. Vano miyo khwira, "Moosuwela, owaani nipuro nooreerexa." Naarowa nitthikelaka owaani. Miyo khwira, "Hiyo ninniphenta olumwenk'ula. Nno etthoko ahu. Hiyo pooti nihuupuwelaka wira ti yeeyo, masi ti yeeyo. Hiyo niyareliwe etthoko yeela. Ela, Muluku onihenle muumu. Khinaarina hata enamuna yo wiiruha mmansihu mu. Hata atith'ihu n'ame ahu khiyaarina hata enamuna. Eyo yaahaana okhala mmatatani mwa Muluku. Atthu anci-ene t'othelana, khanatoko okhalana mwaana. Masi, Muluku aahoon wira vaamuweryaneya hiyo orwa elapo ela.

⁵ Ni nto varuuly'ahu, hiyo khupacerya wunnuwa ni okhala erutthu, ni aatomu ni waarya, ni sikina, vapaceny'aya okhuma vatthayani. Vano nto vaphiyenry'ahu munnuwelo mmosa, awo khuhiya wunnuwa. Hiyo nlelo ninoowuncererya yaawo wa hiyo, masi awo anoorowa. Okhwa wookela.

⁶ "Vano nto emp'ela ya vathi yakurumuwa vale, nookhalana ekina iwe ennilipelela." Munnona? Hiyo ninkela mwa yeeyo, ninoorowa osuwelana mmosa ni mukhw'awe. Khaninwerya ovahana matata; khanirina hata moonelo wo woona iwe. Khaninwerya. . . Nkaarowa owerya woovahani ntata,

wira, “Ehaali anyu, munna,” okhala wira miyo—miyo... khamwaarowa okhalana enamuna yeeyo ya ntata. Masi, nnakhala vo, hiyo khaninkhala mw'erutthuni ntoko siry'ahu vano, niri mw'e—mw'erutthuni ya wirimu. Vano nto okathi ela...

⁷ Nto kaamuupuwela, wira wEjitu, wira okathi Yosefe aahiyenry'awe eyuupuxeryelo, aana a Isarayeli, makhuv'awe, wira nihiku nlo awo yaamukhuma. Nto okathi yaarow'aya okhuma, awo yaamukuxa makhuv'awe, erowaka muttethe wa natiri. Ni khula muHeperi aatthuna otthikela elapo aya, vano hata wira aakhalihiwa vooreera enamuna xeeni, nnakhala vo otthuna wawe waari otthikela elapo awe. Nto khula okathi awo yaavir'aya ni wona makhuv'ale, yaanisuwela wira nihiku nlo awo yaamuhokolowela elapo aya.

⁸ Hiyo niry'ene mu, niwehereryaka olapuwa nipuro nla, ninnoona mahiye oohikhal'etthu oYerusalemu iwe, annisuweliha wira yookhala ekhumelenle. Vano nto okathi onrow'ahu okuxa ele yoovuwihwiwa. . . kahi yoovuwihwiwa, masi erutthu ya wirimu, ni khuneetta ilapo sa Movuwani ni Kristu, niwehanaka mukina ni mukhw'awe, nilavulaka mukina ni mukhw'awe; ninoowerya ovaanela. Minepa s'atthu vathi valtaari, sinkhuwela, “Mpakha liini?” Vano nto enrowa okhala eyuupuxeryelo xeeni iwe, wira nintthikela-tho elapo ya vathi wira nilye ni niwurye ni nirupe? Owo onrowa okhala weiwe, okilante-ene Veehiceni, mw'erutthuni. Amen.

⁹ Nihiku nlo Owo onoovenya, mw'erutthu yeele. Nto okathi Owo onihokolow'awe, irutthu iya sa wirimu sinrowa okhala soovuwihwiwa. Vano hiyo ninrowa okhala ntoko Yoowo, ni ninrowa okhala mahiku othene mw'erutthuni memmo. Exeeni e... Etthu—etthu xeeni ekina encala? Munnona? Sothene soomalihwiwa. Eyo paahi... Mwiihele nankura vaavo. Vano nihiye ela...

Mirromelo saka khasilipanne etthu
 Woohikhala Ephome ya Yesu ni exariya;
 Okathi sothene sinrukurerya munep'aka
 simmor'aya,
 Nto Owo ti murromelo aka wothene ni ikuru.

¹⁰ Kristu ti Mmosa okhalinhe yooweryaneya; kahi ekerej'aka, wala kahi muromolelo aka, kahi apatthani aka, masi Kristu.

Itthaya sothene sikina mithaaka sinkomowa,
 itthaya sothene sikina.

¹¹ Khivanxankiha wira Eddie Perronet... Atthu yuupuwela wira aaroovahuwa. Nto nihiku nle, okilante-ene vale ntoko epottha w'atthu, Eroho Yowarya khurwa vano khukuxa ekaneta khupacerya olepa esipo ele yooreerexa enrowa wiipiwa vamutekoni wa niira n'orapihiwa Mwene a mamwene: *Othene Ethamale Owerya Wa Nsina na Yesu.*

12 Yoohimya yooreera enikhuma onkela epheyo naanaano. Naahikhalana ya arumeyi, kahi ya arumeyi, masi olya wa voosiisu w'Alipa a Nakoso aKristu o...oMinneapolis wu, nto olya wa voosiisu wuulupelaxa nitonko ahu okhalana w'alipa a a nakoso. Atthu ikonto piili yaarwiye.

13 Vano Apwiya khunivaha Mutthaka mmosa. Nto voosiis'ule, wowiihanani waltaari, alipa a nakoso miloko mithanu yaahirwa wa Kristu khuyariwa vasya, voosiis'ule vamutekoni w'okokhorela. Oh, eyo yaahihakalaliha murim'aka, mulipa a nakoso okela! Miteko s'okokhorela sooreera, mapuro othene. Apwiya ettotopeliwe, ni ovuwa wothene ti Wawaya!

14 Nto vano kookhalana elepelo yaamukhaani va, ehimnye wira, "Kinrowa okhala liini oIndianapolis?" Mweeri wa Junho mahiku yeettaka 11 mpakha 15, onrowa okhala oCadle Tabernacle oIndianapolis, Indiana, Junho mahiku yeettaka 11 mpakha 15, atthu oophiyaka ikonto muloko n'emoso.

15 Murotto, ninookhuma nirowaka oShreveport, Louisiana, ni ninrowa okhala weiwo emalelo y'esumana yothene oShreveport, Louisiana.

16 Vano nto ninkhuma oShreveport nirowaka Houston, Texas, ninrowa okhala weiwo mahiku maili, anrowa okhala Esekunta ni Namaili.

17 Vano numala mahiku yeettaka 16 nimpacerya oMexiku wa khalayi, Epooma y'oMexiku, oMexiku wa khalayi. Mwenye Arganbright onoomalaru okiihana. Nto awo aroophwanya nipuwa nuulupale iwe, nirina opuro w'okilaathi wa atthu ikonto miloko mithanu na mosa. Ni sookhala ikereja imiya xexe sinkhaliheryana, siilepihale. Ninnaawehererya ikonto emiya emosa vamuthukumanoni.

18 Ni owo okathi woopacerya ela...Nookhalana etthu y'omuttotopela-no Muluku. Emaara yoopacerya mwa wahala a oMexiku, kuveerunu otonko awe omwaakhela vooreera muPrustante ni onivaha nipuro n'orwa. Emaara yoopacerya mwa wahala a oMexiku, mu—maPrustante atonko aya waakheliwa vooreera. Ni Mukhulupal'ole Valdivia, Mukhulupale a anakhotto a oMexiku, ooyariwa vasya ni ohaakhela Eroho Yowarya. Nto mwaha w'omuttotopela wawe kuvernatooro a oMexiku, onnivaha ihaakhi sa kuveerunu w'okela nikhapeleliwe-ene ni mamiliisiya. Ni wira niri. . .

19 Koophwanya nipuwa nle nuulupale nintthimaka imompe. Eyo ti etthu yuulupalexa eri oMexiku wothene. Annikela atthu ikonto miloko mithanu na mosa, ntoko siisa sa, ohiya ni—nipuro ninwaniwa—mo, moosuwela, memmo. Vano hiyo naahiphwanya wa mahiku muloko ohiyu vano, voohinteerya, voottharana wa ohiyu muloko wootharana. Mukhale mukivekelelaka.

20 Miyo kinoona paahi...kinniwa oruma wa epula yowaatta weiwe. Miyo paahi...Atthu a oMexiku alipa-oowaamini

ookhweya saana, owiiyeviha. Nto yamararu okupalihiwa... Awo aKatolikaa. Nto yamararu okupalihiwa wira Ekeekhai ekeekhai, nto eyo ennimaliha mwaha wa sothene.

²¹ Vano, nihokolowaka wo waakuva okhuma oMexiku, ninootthikela va mahiku yeettaka ntoko 30.

²² Nto mahiku yeettaka 1, owo voosiisu wa Paasikha, mutapernakulu va, wira nikhilane muteko wo okokhorela wa nsuwa niphattuwaka. Ni muteko w'ovoniha, onrowa ottharelana. Ni muteko w'opatiiso ohiyu yoowo, otapernakulu. Nto munoowerya waaleela apatthan'inyu, vano, wira yaaruhe arett'aya othene ni ooxanka, vamutekoni w'okokhorela wa Paasikha. Muteko w'okokhorela wa nsuwa niphattuwaka voosiisu yoowo. Vano, voottharelana yeeyo, ewoora ya namuloko, ya neethanu na xexe ni minuutu miloko miraru okathi wa exikola ya Ttiminku ntoko kweewe. Nyuwo othene mwitthokiherye yeeyo, exikola ya Ttiminku. Nto mu—muteko w'ovoniha onttharela yeeyo, mu-... muteko w'ovoniha ntoko kweekwe ninkhalanak'ahu mukampaanyani.

²³ Vano siiso, nto, Epooma y'oMexiku enrowa okhala emaara yoopacerya yoowoona ela ya naanaano, Apwiya akihimenry'aya, enrow'aya wiiraneya okathi uwo. Tivo ninimwehererya tho, Apwiya yatthuna vale, vaava va, Ttiminku ya Paasikha voosiisu, nirumeelaka isaala iya piili, ...? ... va, moone. Vano ninniwehererya okathi muulupale va, voosiisu wa Paasikha.

²⁴ Ni mooniheryo wira Pwiya Yesu oohihimuwa mw'alipa-ookhwa, Owo mukumii. Ayo, mulopwana. Ni Owo onkhala mukumi okhuma Paasikha oopacerya. Ni Owo ori vaava ni hiyo hata naanaano. Ni kinniroromela paahi wira Apwiya anoonivaha omwaraxela wuulupale wa iparakha Saya voosiisu uwo.

²⁵ Vano ninoorowa o...okhuma va, vaava nto, ninoorowa oChicago, mahiku 11, 3 mpakha 11. Nto ninkhuma Esekunta, nipacerye weiwo Namaili, ni nipacerye mpakha e...Nnari, mahiku yeettaka 3 mpakha 8. Vano nto mahiku yeettaka 11 nimpacerya oCharlotte...Nnari, oColumbia, oCarolina du Norte. Nto numala ninrowa Spindale, oCarolina du Norte. Vano nto, okhuma weiwo, ninrowa oCharlotte, oCarolina du Sul. Vano nto Anchorage, Alaska, n'ukhuma weiwo; mpakha Anchorage, Alaska. Vano, nihokolowe. Ni voohisuwanyeya saana, masi, alakela, khino okathi yoowo, eheema enookhala elikanne-ene wira nipacerye mukwaha. Oh, kinoomalaru tu... .

²⁶ Moosuwela entthun'aka wira? Munoovekela ni miyo mwaha wa yeela? [Muthukumano oniira, "Amen."—Mol.] Nkawehani. Kintthuna o, vahinatthi opisa, Apwiya yatthuna vale, kihele eheem'eyo wenna nno oFall City wenna, ni okhala weiwo wa muthukumano wa isumana soophiyaka xexe wala thanu na mosa; okhala wenna paahi mpakha ekhotto omala. Nto nyuwo

mukhale nvekelaka mwaha wa yeeyo vano. Nto kaatthuna kookole wenco eriyari ya Jeffersonville ni New Albany nipuro nlo, ni kikhalihle mapuro oophiyaka ikonto thanu na piili wala thanu na tthaaru ookilaathi-mo. Vano nto ninoowerya wuncererya-tho mahiku akelelaka ohoolo, ni okhala wenco paahi mpakha omalihiwa. Amen.

²⁷ Vano nto, numala, kinoona wira nto mahiku yeettaka 11 mpakha 15 a Junho, oCadle Tabernacle oIndianapolis. Vano nto, 17, kookupali, mpakha 21 a Junho, onrowa okhala oMinneapolis, mukampu wa mphira iwe, anikilaathi atthu ikonto miloko miili ni thanu na piili. Owo muthukumano wa mulaponi mothene w'Alipa a Nakoso aKristu, olaleya, ni okhalana mavekelo w'aretta khula ohiyu.

²⁸ Nto vano mukhale nvekelelaka seiya, mwiire, nvekele saana. Miyo—miyo kinoona paahi wira kharirina okathi munci-ene vano. Ni kinnihimya khalayi ene; nkinihimya wira ala t'Apwiya anihimya ela vano. Miyo—miyo kinnihimya khalayi ene wira eyaakh'ela Amerika onoomwaakhela Kristu ahiiso omukhootta Kristu. Munnona? Kookupali wira ola onrowa okhala okathi wo othanla, Amerika onrow'awe okela. Ninoorowa okhalana muhakalaliho nihiku nla, ahiiso kharinrowa okhalana muhakalaliho. Ni kookupali wira ela ti eyaakha Amerika onrow'awe wira ethanlelo awe. Ni kinniroromela wira atthu anoorowa wira ni anookhalana muhakalaliho muulupale onrowa ovela. Ninrowa okhalana olaleerya wunci-ene, ni olaleya ehapari wunci-ene, masi nimphavela muhakalaliho (kahi siiso?), muhakalaliho w'eekekhai. Ti yeeyo emphavel'ahu. Apwiya yooreeriheni.

²⁹ Kinnitthapela omoona Munna Graham vale, ni—ni ko—kookupali wira Munna Smith okilante ohoolo wawe, Munna Smitth a ekereja ya Muluku. Ni—ni aakhala arumeyi anci-ene mu, kookupali. Nto hiyo ninniwaakhelani vooreera nyuwo othene, axinna, khula mmosa ni othene, ni aletto mmukhora mwahu, othene aniira mpantte. Hiyo ninnoophentani saana.

³⁰ Nto vano numala soohimya iya, ni nisuwelaka wira ohiy'ula, ohiyu w'opatthana wa muteko w'opatthana. Nto munvekelele vanci-ene Munn'ihu oophenteya Neville yoowo onkhapelela muteko va otapernakulu, onvara muteko muulupale; ni wa masantu othene mapuro othene. Oh, okathi xeeni w'ephavelelo! Okathi xeeni w'ephavelelo! Kinniiwa okhuma w'Afrika, ni wiihaniwa mwaha wa w'Afrika.

³¹ Ni Munna Arganbright aamukilela naanaano mutelefoonini, okathi vakhani ovinre, wira mwene a—a ilapo kamosa-kamosa iye wu, kinooliyala waari nipuro xeeni, kookupali wira ti nno oSuwesiya, Suwiisa. Kinoophwanya muhina mwa minuutu mmosa. Dinamarka, o—oolepa epaphelo

emosa yoosuwanyeya wira okhalihe ela ehuhu yo orowa weiwo okathi ula.

wAfrika ni oHintiya, mapuro manci-ene oohiyana-hiyana!

³² Weiwo, Ikisiro sa Hawaii sikenly'aya nihiku nle. Eyo ekwaha ntoko ya namuloko yootharana alikanry'aya mwaha wa muhakalaliho. Alipa a Nakoso aKristu anthhuna erowase weiwo etuphe mwaha wa yoowo, elokihe sothene, ethhokihe muthukumano ni kaalaleerye voosiis'ule, vano nto opacerye muhakalaliho oHawaii.

³³ Tivo, olumwenku wothene wookhala eparookiya ahu, moone, olumwenku wothene. Nto hiyo n'arumeyi Awe.

³⁴ Tivo nrowe nuupuwele, apatthani, wira ola pooti okhala ohiyu wookiserya, ola pooti okhala mwaakha wookiserya, wala pooti okhala nloko nookiserya. Munnona? Hiyo khanisuwenle. Masi, nnakhala vo, hiyo noosuwela ela vekeekhai, wira ale ari akumi aasuwela wira ahaana okhwa. "Mutthu oolamuleliwa okhwa, numala yeeyo Ophukiwa." Nto aakhanle-ene mutthu va ohiy'ula, ohikhanle oolikana wira akumane ni yeeyo, ni ohirina nrromel'ola wooreerihwa, ola okhale p'uhiyu onrow'anyu omuthanla Pwiya Yesu, emaara emosa tu, mpakha Voohimala.

Vano nivekele.

³⁵ Tith'ihu a Wirimu, nintthuna nooxukhuruni Nyuwo muhinaxa mwa murim'ahu, nisuwelaka wira ninoolipelela va, woohikattyamiheya hata vakhani; hata wira simpakiwa ikapwitthi kavi s'atomu, ni atthu akavi a muteko wa kuveerunu aniheliwa wira awehaweheke matteeke, olumwenku ti wowuukhuleya ni woothukumela. Hiyo nimmumula mwa nrromel'ola wooreerihwa nirin'ahu. Hiyo ninlipa mwa muteko woomalihiwa wa Muluku oKalvario, mwa Kristu. Nisuwelaka ela, wira emp'ela ya vathi yaahikhale-tho, nookhalana emosa yoolikana ennilipelela epantte ekina; yoovuwexa, ottaiwenexa, weiwo ohikhanle-wo owereya wala ohaawa, eretta. Hata okathi wo wuuluvala khunkhalakhala ophiyeryaka, nnakhala maihi oottweelela, nnakhala ninnyaari, masi ninrowa okhala amiravo iwe voohimala.

³⁶ Bibilia ooreerihwa, yoowo ohikhanle ohimyaka etthu yoohikhala ekeekhai, oonivaha nrromel'ola wooreerihwa. Ni Eroho Yowarya, nave, ti namoona, onikhalela onamoona yeeyo. Mirima sahu sinniwehererya yeeyo. Ni hiyo noosuwela wira Bibilia onninihimeerya siiso, okhanle Masu a Muluku, ipyo wira saaliwe ethhaya ela yooruwerya wira enimumulihe mwa nrromelo yoola.

³⁷ Muluku, kinvekela wira Nyuwo mmukwannye khula mutthu ohiy'ula, ori ota wa Kristu. Ni mwaaruhe vakhiviru va, mweettel'ola wooreerexa. Mwaavonihe aretta va ohiy'ula, Pwiya. Khivanihovereya, wira mwa atthu ala anci-ene,

vekeekhai sookhala iretta eriyari ahu. Nto ninoovekelani Nyuwo wira munvonihe khula mmosa.

³⁸ Vano murwe mwa Masu, Tithi. Mukuxe Masu yaawo akhanle mukhoyi w'ekumi. Mitathaari, Pwiya, sa ephattu y'atthu othene. Ninvekela wira Eroho Yowarya ekuxe khula Masu ni evahe Yaawo murima siiso ntoko simphavel'ahu. Wira nipatthane vakhiviru va Masu. Vano ninvekela mwa Nsina na Yesu. Amen.

³⁹ Wira nisome vakhani Soolempwa, ohiy'ula, wa paahi yo—yoosoma yaamukhaani, wira nehererye ophavela enihimy'aya, ni wira naanaanoru nikele mwa Masu, wira niwerye okhalana ekomunyawu. Meelo okhanly'aya Esekunta, koosuwela wira khonnisivela wuupuwela itthu iyo, s'okhala otthikelaka omutekoni, masi nihaana okumanana eyo. Nto imaara sinci-ene, moosuwela... Masi, mwa sothene, ela t'ekhanle yoothuneyaxa ovikana miteko ni itthu sothene sikina. Munnona? Maana, muteko anyu onoomala, nihiku nlo, ni nyuwo munoomala ni yoowo. Masi mwakhalana-ru Ekumi Ehinimala, khamunkhalana emalelo. Ti Yoohimala; enookhala, voohimala. Muupuwele yeeyo. Ekumi ya mahiku othene, ehirina emalelo. Okathi okathi ohiniphimey'aya, nyuwo nlelo munrowa wira mukhalaka. Okathi iyaakha imilyawu sinvir'aya, hiyo nlelo ninrowa okhalaka. Vano, mwaha wa mahiku vakhani paahi mulaponi mu, miteko khasinihimyaxa etthu. Sinoonikhaliherya paahi okelela ohoolo, othuma yolya ahu vakhani, ni sikina, olya, seiyo sintthuneya wira nikhalane.

⁴⁰ Vano mwa aKorinto Oopacerya kapiitulu 10, opacerya versiikulu 12.

Tthiri ole onoona wira orimweemela aipasoope ahimore.

Khuuvo wehereriwa woophwanyeni woohikhala ole... onaaphwanya atthu akina: masi Muluku t'ororomeleya, yoowo ohini... yoowo—yoowo ohinthuna wira nyuwo... ohinoohiyani wehereriwa onvikana ikuru sanyu; masi... mwa khula wehereriwa nave-tho onnoovahani oxintta, wira nwerye ovilela.

⁴¹ Eversiiikulu xeeni yooreera! Apwiya yincererye iparakha Saya mwa yeeyo. *Othukula Ephiro*, ti yeeyo kintthun'aka olavula, ohiy'ula. Moosuwela... Awo yincererye iparakha Saya mwa Masu Aya, okathi onwiriran'ahu vano Masu.

⁴² Owo muupuwelo aka, wira vakhala wira Masu, yaawo akhanle mitathaari, sikhanelle etthu ene enlipiherya. Imaara sinci-ene mwa miteko saka soovoniha, miyo—miyo kinniphavelaka o, hata alipa-ooxuttiha numala ovira mwa yeeyo yothene, kinniphavelaka otthika ni—ni okuxa Masu okhaliha mulipiheryo.

⁴³ Ohiyu wa mahiku vakhani avinre, kahaakhela epaphelo yaamukhaani yo opwapweliwa, yeeyo yaari yooreera.

Mulopwana mmosa aarookileela, khwira, “Munna Branham, nyuwo mwa mmiravo paahi, nlelo.” Khwira, “Miyo kaanilaleya Ehapari yooreera nyuwo muhinatthi oyariwa.” Nto owo khwira, “Miyo. . . Iyaakha saka sothene miloko mixexe ni thanu na mosa, masi nlelo. . .” Owo—owo aari musomiha a exikola emosa ya Bibilia. Owo khwira, “Masi mutthu, ntoko nyuwo, oniwiixuttiha atthu, nave nlelo khunakhalana moonelo mwaahimaly’anyu ohiy’ule.” Khwira, “Kinoona wira ti yootheiha.” Khwira, “Muhimye wira xetwani khorina owerya wo ovoniha.” Owo khwira, “Khino, ankhii koohimenryeni wira xetwani ohaana owerya wo ovoniha.” Khwira, “Vano mwaamukikoha, vaakhanle wira mwaahikhala-vo, mpakha vansuwel’aka.” Khwira, “Kinimooheeryani.” Khwira, “Muttetthe ahu, ookhala muthiyana mmosa onkhala weiwo orina e—erooho yootakhala. Nto owo. . . Atthu annimurweela yoowo wira evonihawe.” Oniira, “Owo onookumiha maihi mmuruni mwaya, ni noonuula ephome mmutikani mwaya, ni wootowela maihi yaala. Onimweetta mpakha omuro, nto onoorihela etthu ila mmakhatani mwawe, khuhiweha ottuli. Aweha vale ottuli,” khwira, “nto eretta enihala ni mutth’uwo. Masi owo ohaana orihela mmuro, ntoko wira erooliyaliwa, vano khunarowa.” Nto khwira, “Atthu ipursentu miloko mithanu na mosa, naawaalank’ahu, aavonihwiwa.” Khwira, “Vano, vakhala wira xetwani khonwerya ovoniha, ankhii yeeyo?”

⁴⁴ Vano, miyo kaahimwaakhula. Miyo khwira, “Munn’aka, ooreera murima oophentiwa, wa nttittimiho wothene onthuneya mwaha wa iyaakha sanyu,” moone, “wa nttittimiho wothene onthuneya mwaha wa iyaakha sanyu so osomiha wanyu, masi kinimooleelani vano wira Yesu Kristu ohimye wira xetwani khorina owerya wo ovoniha. Nto vakhala wira Yesu oohimya, eyo ennimaliha mwaha, ni miyo. Owo ohimye wira ‘Satana amoomola Satana, wesoo omwene awe onookawanyeya nto onookhalana emalelo. Nto khokhanle omoomolaka Satana.’ Vano nyuwo mwaamukikoha, ‘Xeeni atthu ala yaavonihwiw’aya?’ Vano, kahiyo mutthu ene. Mukhwiri uwo kharina naata n’iyo, siiso miyo kahaarow’aka okhalana naata, wala mutthu mukina. T’atthu anaattamela, yuupuwelaka wira antthara ephiro evaheriwe ni Muluku wira ephwanye ovona waya. Onkhala omwaamini waya wa mutthu Muluku, onruuha ovona. Munnona? Iwo ti waattamela awo anuupuwel’aya. Kahiyo mukhwiri, siiso ahaarow’awe okhala mutthu.” Ayo.

⁴⁵ Vano, tivo, Ehapari yooreera enwerya ovarihwa muteko paahi, ahiiso enwerya ophwanywa paahi okathi Masu a Muluku aniixuttihiw’aya. Vano atthu anihelala mirorolelo saya vasulu va Masu a Muluku Oohimala. “Waamini onrwa mwaha wo wiiwa, wiiwa Masu.”

⁴⁶ Dr. Adair, nno opooma, mpatthani aka oophenteya, aahikileela nihiku nimosa, owo khwira, “Billy,

khamunuupuwela wira vaakhanle wira atthu yaanaamini okwannya mwiri ule vale, yaamukhalana iphwanyeryo imosaru?"

⁴⁷ Miyo khwira, "Mwaarowa owerya sayi waamini yeeyo? Vaakhanle wira mwaamuwerya okhalana waamini omosaru, waamini...mwaaminiki wira yaari ephiro yovaheriwa ni Muluku, wira okwannya mwiri, ni wira waamwiira, weso saamuwerya wira. Masi t'ani onaamini mwiri?"

⁴⁸ Miyo kinaamini ele Muluku ohimaly'awe, ni kinkuxa yeeyo paahi. Vano waamini khunlipiheriwa vasulu va ithaaka sinkomowa sa—sa miyuupuwelo so wuukhuwa. Masi waamini onlipiheriwa vasulu v'ettharihelo, Masu a Muluku Oohimala, Mwala wa okathi. Ti vaavo waamini oniphwany'aya nipuro naya n'omumula n'ottittimiheya ni khunkhalakhala ottikinyeyaka, walipiheriwa-ru vaavo.

⁴⁹ Vano, otthukula ephiro. Nkinaamini wira Muluku ootoko weetiherya muteko Awe pure-pure. Miyo—miyo nkaarowa wettiherya wawaka, nyuwo khamwaarowa weetiherya wawinyu. Yesu khokhwiye oKalvario vari ohimya wene, "Ahe, vano khino atthu anookoonela othunku, okhala wira Miyo kihoorwa, kinrowa elapo ya vathi kakuxe mukhalelo w'erutthu. Nto awo vekeekhai animoopowa, khino, yoonaru moota onrow'aka wooniha othunku kaakhw'aka." Muluku khiirale eyo. Yesu okhwenle etthunelo emosa, nto eyo yaari owoopola ale Muluku aasuwenly'awe khalayi ene wira yaamoopowa. Ti yeeyo. Muluku aahisuwela wira aamurowa okhala mutthu aarowa woopowa, nto yaahaana okhala elokiheryo, wala enamuna yoopakiwa wira awo yoopowe. Yahaakhanle, woopowa khuwaarowa oweryaneya.

⁵⁰ Tivo, Muluku, asuwelaka khalayi ene wira atthu yaamurowa woopowa, aasuwelaka wira yaari ani, Owo aahaana okhaliha ethokiheryo. Vano nyuwo mwaamukiirela, "Munna Branham, nto Muluku onnisuwela oratteene t'ani onrowa woopowa?" Voolikana. "Ahe, Awo xeeni ohimyaka wira, 'Owo khonththuna wira akhale mano mmosa onipweteya?'" Owo khonththuna. Owo khonththuna wira akhale mano mmosa onipweteya, masi atthu othene erukunxe murima.

⁵¹ Masi, wira akhale Muluku, Owo ohaana osuwela t'ani onrowa wira yeeyo, ahiiso Owo kahiyo Muluku. Okhala wira, Owo ti—Owo t'owerya sothene. Owo onkhala mapuro othene. Owo t'osuwela sothene. Owo onnisuwela itthu sothene. Owo ori mapuro othene, ni oowerya sothene. Tivo, osuwela khalayi ene onniweha ottuli n'uhimya wira Owo aahoona ela khalayi ene, ni aahisuwela, tivo Owo aaniwerya ohimya emalelo xeeni yaari, okhuma wopaceryani.

52 Nto, tivo, asuwelaka wira mahiku ala othene ooreerexa hiyo ninkhal'ahu vano, ni okhala ni okhalela onamoono, ni woona itthu sinoon'ahu vano, Muluku aahaana olokiherya yeeyo.

53 Ohiyu uwo, nkaareere otikinihiwa. Mwamuthiyana mmosa aarimoorwa vaplataforma. Nipuro nle nuulupale na itoolare ikonto imiya tthaaru vale, nto aahipintari vakhani wiitho wawe. Owo khweemela vale khupacerya othukumela. Miyo khwira, "Nyuwo mwa muLuterano," ni Eroho Yowarya.

Owo khwira, "Ayo, mulopwana."

54 Nto miyo khwira, "Nyuwo muri va wira nvekeleliwe. Nto etthu muneettel'anyu ntoko sineett'anyu, makutha oomanli yaarimunteya." Miyo khwira, "Yiiraneiyee mwaha wa ehasara ya ekaaro, ni ekaaro nyuwo mweettih'anyu, iyaakha xexe sivinre."

Owo khwira, "Eyo ekeekhaii."

55 Miyo khwira, "Meetiku anyu mutthu mmosa, ooyeva ookhuveya, a ntari ni onniwara ilumeta."

Khwira, "Ti yeeyo."

56 Nto miyo khwira, "Owo onooloolani okhala wira mma—mmakuthani, nikhuva nirookhala n'elapaha, ni hata erutthu enimuntta vanikhuvani."

Owo khwira, "Ti yeeyo."

Nto owo oniira, "Wookhala nrromelo wa miyo?"

57 Miyo khwira, "Eyo enttharana ni omwaattamela wanyu Pwiya Yesu." Miyo khwira . . .

Owo khwira, "Munniwerya okikhaliherya?"

58 Miyo khwira, "Nnari, muthiyana. Khaavo onwerya wookhaliheryani vano. Masi muhaana wiikhaliherya mmansinyu mwa iparakha Muluku ovahenry'awe mwaha wa nyuwo."

Nto owo khwira, "Vano miyo kinnaamini ni murim'aka wothene."

59 Miyo khwira, "Apwiya ahoovonihani, munna. Eyo ti SIISO ANIHIMYA T'APWIYA. Moovonihiwa."

60 Owo khwira, "Mwenye Branham, nkinweryaka okokhoro," owo khwira, "mwa iyaakha xexe." Anlaka, eemenle-ene vale, attikitthaka matat'awe. Nto muttitthi muulupale w'atthu wunlaka, omuwehaka yoowo; aLuterano, aPrespiteriyaano. Nto miyo khwira, "Muhinkhuruwela-ni murowa waltaari mukokhoro?"

61 Owo khwira, "Mukihiye kikokhore vaava, vaava kivonihiw'aka." Owo iira ahitonko ottikinya manawo awe, masi aahisuwela wira aahivonihiwa. Yaahiiiraneya etthu. Munnona? Owo aahisuwela. Khiwaakhanle hata waanyiherya yeeyo.

Miyo khwira, "Mukokhore."

62 Nto emaaara yoopacerya mwa iyaakha xexe, ni makutha oomanli yintakaseiye-ene ni othene arine-ene makuma, epakeiye-ene, makhuva epharanne; muthiyan'ole, ntoko mwamuthiyana, aakokhonre ni maithori emoraka wiitho wawe, khunvenxerya matata Muluku. Ahe, khovenya naanaanoru vale, vookhweyaxa, ntoko mwanamwane mwamuthiyana, nto khukhuruwa vaplataforma. Yaari exeeni iyo? Muluku aahaana opaka ephiro ya yeeyo.

63 Vano, Owo aahaaruma mameetiku, eyo ekeekhaii. Ni mameetiku ti vooreera, ni awo yaahiira sothene saawenry'aya wira. Masi Muluku aahipaka ephiro. Ti yeeyo. Munnona? Meetiku vamanly'awe ovonya, mwa ephiro awe, ephiro ya Muluku t'eri vasulu saana ovikana ephiro ahu. Etthu xeeni yooreerexa!

64 Vano, wuupuwela, ohiy'ula, wira nyuwo ni miyo... Khani, khaninthuna wuupuwela ela, masi vekeekhai hiyo naakhenle mukhalelo ntoko olumwenku, niire, ntoko ikuluwe. Nto, ohiy'ula, nookhala masantu. Yaahaana wiiriwa etthu. Vano, khanaawerya orowa Wirimu, ntoko ikuluwe. Naahaana orowa Wirimu, ntoko masantu, vano yaahaana okhalihwiwa etthokiheryo mwaha wa yeela.

65 Vano Muluku khuvaherya vooreerexa mwa Waataana Wa Khalayi. Khalayi muLiivuruni mwa Mothakoni, ntoko kapiltulu 20, ni mwa Okhuma ntoko 36, 32, nto ninniphwanya wira Nihiku na Elivelo... Muluku, mwa ithoonyeryo, oniheryaka khalayi ene etthu Owo aarow'awe wira, mwa omalihereya wa ethoonyeryo, okathi orwiiy'awe, yoowo aari Kristu.

66 Mukhulupale a anamukuttho aarummwa okuxa ipuri piili, ipuri sikhaani, n'uroiha wira sapakeliwe elivelo, mwaavulo, ni mwaanyompe mwaha w'amusi awe yoowo. Nto anci-ene a nyuwo anamasoma va, ni alipa-oomusoma Bibilia, moosuwela moota saakhal'aya ilivelo. Masi nto, epuri emosa... Waahaana okhala othanliwa. Nto othanliwa waamorela epuri emosa, eyo yaamookhwa, vano nto ephome y'epuri ila yaaheliwa epuri ekina, ni matata a mukhulupale a anamukuttho, alapaka itampi s'atthu, vasulu v'epuri ekumi. Vano nto mutthu aari oophwanela, aakuxa epuri ekumi vathi va moonoo awe, khurowa mothakoni weiwo epuri yaarin'aya opweteya n'urowa nipuro, n'omeekha ottaiwene. Nnakhala tho, mwa mukhalelo owo, otthikela-tho mw'emusini mwaya, masi okhala meekh'aya voochimala-tho, eroihaka ottaiwene itampi s'atthu.

67 Vano, koosuwela wira asomi anci-ene, alakela, akilanthe vaava. Ni vanci-enexa Ativentista, awo—awo anihimya wira "Epuri emosa aari Kristu, nto ekina aari xetwani." Vano, axinna, kihaana ovirikanya yeeyo vakhani. Khanikhanle omuhelelaka mukuttho xetwani. Ipuru soopiili saamuthoonyerya Kristu. Soopiili saya aari Kristu. Kristu t'awihu...Owo oomwarexa

ephome mwaha wa itampi sahu ni ookuxa Yoowo Mwaneene, aroihaika ottaiwene. Xetwani khonwerya okuxa itampi saka. Kristu t'okhanle namakuxa itampi sahu. Musuwele saana eyo, vano waamini wanyu khunrowa ottikinyeya. Kristu ti namakuxa itampi sahu, ni itampi sa molumwenkuni.

⁶⁸ Kristu t'ari mwaaxinama okhwiye vamwiikimanyo, mwiiwe, “Mwaapwittipwitthi iiviwe okhuma opattuxiwakaru olumwenku.” Nto ithoonyeryo sene, hiyo naaphwanya mireerelo, nisuwelaka wira omaliheriwa wa ethoonyeryo waamurowa orwa nihiku nlo.

⁶⁹ Owo iiveliwani okhuma opattuxiwakaru olumwenku? Okhala wira, Muluku aahoona mmuupuweloni mw'Awe, moota itthu iyo saarow'aya okhala, ni ekereja xeeni yaarowa okhala, ni xeeni yaarowa okhala itthu sothene, nto Owo khulavula Masu. Nto okathi Muluku onlavul'awe Masu, enkhala ntoko ehiiraneya, okathi ene yoowo, tivo Owo iiviwe okhuma opattuxiwakaru olumwenku. Munnoona yeeyo? [Muthukumano oniira, “Amen.”—Mol.]

⁷⁰ Mwaphiyererya yeeyo vano, ni ohiya waamini wanyu omumula va nttittimiho; kahi mwa mutthu, kahi vasulu va teyoloxiia a mutthu, kahi vasulu va miromolelo sa ikereja, hata sikhalka sooreera enamuna xeeni, hata mutthu areeraka murima sayi. Muhiye waamini wanyu omumule paahi mwa muteko wa Kristu omalihiwe oKalvario, mwaha wa soopiili etampi ni woopoliwa. Munnoona yeeyo?

⁷¹ Nwehe, Kristu aahirwa, nto Owo aari mwaaxinama aarowa okhwa, okhala wira Owo aahilikana (mwa ethoonyeryo) iiviwe ohinatthi opattuxiwa olumwenku. Munnoona yeeyo? Muluku aahilavula ni ahihimya wira yaarowa okhala siiso. Tivo, Muluku aalavulaka, yoolipiheriwa Wirimu voohimala. Masu, e . . .

⁷² Ti vaavo murin'anyu okhalana waamini. Mwaaminikiru wira ala Masu a Muluku, Ahinimala ni oohirukunxeya, vano khula nikano nilavuliwe muhina mwa Masu a Muluku ninkhala Epyo. Ni itthu sothene Muluku olavunly'awe, muhina mwa Masu, soomala olipiheriwa Movuwani. Ni moovaheriwa wira muttharihele. Vano muhoove okuxa khula nipuro na Masu a Muluku Ahinimala, oottottopeliwa, otthukela nankura Yaawo mmurimani mwanyu. Vano, Awo ahaana okhala vatthayani.

⁷³ Vano, mwa nlikanyiho, kookuxa enuku ya nakhuwo khuhela mmalukuni a mukwili wala etthu siiso, eyo alakela khiyaarowa wunnuwa, okhala wira muthinto mmosa w'etthaya yoohiloka. Masi yarowa-ru mwa yooreera, etthaya yooruwerya ya vasulu, enimunnuwa yakhalaru wira enooheliwa mmo. Ni okathi Masu . . .

⁷⁴ Ela eri va vano! Okathi Masu a Muluku ammorel'aya mmurimani w'osareya waamini, Awo ahaana wunnuwa tu. Ehaana okhapelela. Tivo muthiyan'ole eemenle vale, ni makutha

oomaili asareyiye-ene ekalsiyu siisaale, okhuma muteposituni, ni wunteya wa makutha, vaavo oomaili yaanyaanyiye aya, ni makhuva yanttale ni elapaha, ni e . . . nave-tho ethayi. Owo khoovale okhuna makuth'awe. Wa xeeni? Masu yaahimorela mowaaminini. Khuphuwela! Munniiwa saana?

⁷⁵ Muluku, ohinatthi opattuxiwa olumwenku, aahihimya wira Kristu aamukhala va. Ni wira Owo aammwiiva, akhwe, oohittheka mwaha wa ole oottheka. Nto okathi Muluku olavunly'awe, yaahimala olipiheriwa okathi Muluku olavunly'awe.

⁷⁶ Vano, nihinatthi okhala nuulumo, ohaana okhala muupuwelo, maana nuulumo muupuwelo woohimmwa. Vano nto e . . . Muluku, mmuupuweloni mw'Awe, aahona itthu iya, vano iyo saari mmuupuweloni mw'Awe. Vano, Owo khulavula seiyo, vano sinkhala ntoko soomalihiwa okathi Muluku onlavul'awe, okhala wira Owo t'ohivonya ni khokhanle wiiraka-tho etthu ekina.

⁷⁷ Vano, eyiirelo ya Muluku. Vakhala wira Muluku owoopola anatampi ottuli wu, ni mulipiheryo wo okupali mukuttho woopahiwa, mukuttho woovaheriwa, Owo ohaana wira etthu emosaru olelo, ahiiso Owo aahivonya okathi aamukunx'awe mutthu oopacerya attharihelaka yeeyo. Vakhala wira Muluku aahaavoniha aretta ottuli wu attharihelaka ephome yoomwaraxiwa ya mwaaxinama, vasulu va elivelo, Owo ohaana wira yeeyo olelo, ahiiso Owo aahivonya okathi aamuvonihaly'awe mutthu oopacerya. Munnona? Owo khokhanle orukunuwaka.

⁷⁸ Hiyo ninninnuwa. Hiyo ninnittokottha. Hiyo ninniphwanya itthu sootepa oreera. Ninnilavula itthu sootepa oreera. Ninniware ikuwo sootepa oreera, weettiha ekaaroo yootepa oreera. Hiyo ninkelela ohoolo.

⁷⁹ Masi Muluku khokhanle okelelaka ohoolo siiso, okhala wira Owo aari ooloka voomalela opacerya wene. Nto etthu yooloka voomalela khenkhanle okelelaka-tho ohoolo; iwo oloka voomalela. Amen. Tivo Owo khorina wira, "Ahe, ola okathi woovirikana, nihaana muupuwelo wootepa oreera vano." Vakhala siiso, khivanweryaneya Owo okhala Muluku. Tivo, Owo Mulukuu, etthu Owo aalavunly'awe ottuli wu, Owo ohaana okhala ni yeeyo, okhala wira Owo aari ooloka voomalela wu ni t'oloka voomalela vano. Munnona? Munnoona yeeyo? Vano, Owo khokhanle okelelaka ohoolo. Owo khokhanle . . . Ahe, kinihimya, Owo khokhanle oreheryaka itthu. Mukhalihe ela vakhani . . . wira, "Ela yaamukhala yooreerexa vakhani."

Nyuwo muniira, "Ankhi mwaapwittipwitthi a khalayi, ni Mwaapwittipwitthi ula?"

⁸⁰ Ole aari ethoonyeryo, anwehereryaka Owo, ni Owo ohimye wira aari yoowo. Ole aamuhimya Mwaapwittipwitthi

iiviwe okhuma opattuxiwaka-ru olumwenku, wopaceryani. “Kinoohelela owanani Nloko nawe ni nloko n’enowa.” Vano nto owehererya omalela weiwo w’okathi orwa, Muluku aahivaherya ettipiheryo y’etampi, ni ephome yoomwaraxiwa ya mwaapwittipwitthi, ethoonyiheryaka.

⁸¹ Owo oovaherya etthu emosaru mwa mweeri, ohiyu, wo okhala nsuwa okathi w’othana. Mweeri okhanly’aya eruku ya nsuwa, ahiiso nsuwa naarelaka mweeri, nikhalihaka eruku. Mweeri ni nsuwa ti iya ni mwaara. Vano okathi nsuwa ninrow’aya, ninvaha waarya waya mweeri, wira onivahe waarya vakhani mpakha nsuwa orwa. Nto nsuwa vanrw’aya, mweeri onoolakaseya.

⁸² Nto Kristu ti Nsuwa Nenlo nironwe Movuwani, ni ninaarela Ekereja, ni Waarya omosaru Owo aanry’awe Owo ary’ene muumu. Nto Ekereja ti Waarya wa molumwenkuni mpakha Yesu orwa othene atakanxane vamosa. Ntoko waarya wa mweeri ni waarya wa nsuwa onkhal’aya waarya mmosa, okathi ontakanxan’aya vamosa. Ni okathi Kristu ni Ekerej’Awe ankhal’aya vamosa, okathi wa Mileeniyu yuulupale, anrowa okhala mmosa.

⁸³ Nto olelo, “Nyuwo mwa Waarya wa molumwenkuni.” Mwa Mukhalelo Awe...Mwa ohikhala Wawe, kiireke, Owo onoovahani Waarya wira mwaaryaneke, Owo ary’ene muumu. Itthu sothene sa khalayi, itthu sothene sa mulaponi, ti ithoonyeryo sa iye sa Wirimu.

⁸⁴ Hata aranttaasi, anahookho, ni inowa, ni sikina, ti ithoonyeryo sa irooho sootakhala, siisoonihieryaka. Xeeni kankuru akelaka wiihaniwa kankuru? Okhala wira orina mukhalelo w’ekhala. Ni nuulumo *kankuru* nnihimya “ekhala.”

⁸⁵ Vano, moone, itthu sothene iyo ithoonyeryo ni iruku. Tivo, epuri ile yaavuluwa yaaroihiwa mothakoni, nipuro n’okhala meekh’aya, yoovalaanihiwa n’apatthani aya, ekuxaka itampi s’atthu vamuru vaya, yaari ethoonyeryo ya Kristu aavalaanihiwe ni Muluku, ota wa Mukhalelo Awe, ni ookuxa itampi sahu khuroiha omooroni. Nto iwo Muluku khaarowa omuhiya Owo...Davidi ohimnye wira, “Nkinimuhiya Ole Oowaarya aka wuntta. Nnakhala nkinihiya munep’Awe mookhwaani.” Nto mmurotonni mwaya, khuhihimuwa wira nikhalihiwe anaxariya. Masi Owo aathoonyenrye epuri, epuri yoovuluwa, nave-tho epuri yaavaheriwa itampi. Muluku apakaka iththokiheryo, ni ephiro yoovaheriwa!

⁸⁶ Muluku kweekwe onnipaka ephiro y’ovuluwa, khula okathi. Eretta enimoorihelani vanlothoni. Satana onoorihani nipuro nlo vammal’anyu okhala muKristu.

⁸⁷ Khino nyuwo mwaari nacuuku. Munnoona yeeyo? Iturufu siri vameesa. “Hayani, John, noosuwela wira eri mwa nyuwo.” Satana ori vaavo wira oweereryeni. Masi Muluku, mwa khula—

khula okathi, onoopaka ephiro y'ovuluwa nyuwo mwakupaliru paahi.

⁸⁸ Khino nyuwo mwaari na—namuhapaliwa, vano ekoopho eri vathi v'ephul'anyu. “Vano, hayani, John.” Vano, nyuwo mwatthuna vale wiiwelela nsu nlo, munoorowa-tho naanaanoru vamarapheyoni vanyu.

⁸⁹ Masi Muluku kweekwe ori vaavo. Murukunxele muupuwelo anyu Wirimu, nto nwehe oKalvariyo, nto mwiire, “Eroho Yowarya Yoottopeliwa, murwe wa miyo. Kinnitthuna etthu.” Nwehe etthu enkhumelela. Muluku onoopaka ephiro y'ovuluwa, khula okathi, maana Owo onoopaka. Muluku kweekwe onniira.

⁹⁰ Nto vano nwehe. Ohinatthi opwetexiwa olumwenku, okathi atthu yaary'aya anatampi, ni atthu yaari anatampi molumwenkuni, Muluku aahipaka ephiro y'ovuluwa w'ale antthuna ovuluwa ni yeeyo. Muluku aahikhalana ekalawa yaatekiwe, yaathokihiwe. Nowe aahiteka ekalawa wa e... athokihaka ekalaw'ela wira atthokihe ephiro. Nwiriya. Okhuma e...wa ephiro y'ovuluwa, yookhalana...Oviruwa ni ehukumu ya Muluku saamuthukumana wirimu, wira simwaraxeliwe elapo yoosareya etampi ni atthu oosareya etampi, yaawo yaakhottale, ni yaari oolipa murima, yeeta evirikanyaka sooruma sa Muluku. Okathi wothene oviruwa nno waamuthukumanyiwa wirimu, wira omwaraxeliwe atthu, woohukhummwani, Muluku oomoriwa ikharari khupaka ephiro y'ovuluwa w'ale antthuna wetta memmo. Ephiro y'ovuluwa!

⁹¹ Vano noophiya-tho nipuro vaavo ihukumu sinthukumanyey'aya. Nto vakhala wira nihiku nle, mutaseke ohinatthi, khivatampe olelo, okathi ommal'aya wahala a okathi, okathi ommal'aya wahala a ilapo, ni waaphiy'aya w'ethokani waya! Vaatepa oviruwa wa Muluku vasulu v'atthu imilyawu anci-enexa, onuukelana vamosa, mpakha etampi osarya molumwenkuni, mpakha onvevey'aya ntoko namuhapaliwa onihekherya arowaka owaani ewoora ya neexexe. Oronwe-ene ovikana mweeri ni ittheneeri, mpakha ophierya so—soowara sa Yehova a Sabaoth.

⁹² Vano, owo onoohekhererya vathi va muritti wa eyuupuwelelo awe yoopakiwa ni mutthu, wo wiisaakiha wawe mwaneene, wa ateyoloxiyya awe mwaneene. “Awo arookuxa Sooruma sa Muluku khuhonona, mwaha wo wiixuttiha ikano saya s'atthu. Asiveliwaka ni mittotopelo s'atthu ovikana mittotopelo sa Muluku.” Alipa-ooxiixuttiha ahu aakhala ookuttihiwa, ni anrantteliha wiitakanxa mukereja, ni wira, “Ti vooreera, vakhalaru wira muniira mpantte w'ekereja. Muliyaletu.”

⁹³ Masi, munna, Muluku oopaka ephiro y'ovuluwa. Nto nyuwo muhaana orwa mwa itthunelo sa Muluku, nto eyo ti nviraka mwa Kristu Yesu Pwiy'ahu. Khuuvo mulipiheryo mukina okhalihwe woohikhala ole okhalihwe, nnari, khuuvo. Oteka vasulu va

mulipiheryo mukina, ori ntoko makayawaya ni marove, maasi yasarya anookhupa, nto omora waya onrowa okhala wuulupale. Masi Yesu ohimnye wira, “Vamwala va, Miyo kinooteka-vo Ekerej’Aka, vano mikhora sa mookhwaani sinimooceela opwetexa Eyo.” Owo otenke Yeeyo vasulu va xeeni? Va Ekeekhai yowuupululiwa ya muroohoni wira Owo Mwaana a Muluku.

“Atthu aniira wira Miyo Mwaana a mutthu ki pani?”

⁹⁴ “Akina aniira ‘Eliya,’ nto akina aniira ‘Moise,’ vano akina ‘Yohani Mpatisa,’ ni siiso.”

“Masi nyuwo muniira wira Miyo ki pani?”

⁹⁵ Voohithananela, voohikuxa esekuntu emosa...Mwiiwe, natampi. Eyo t’inamuna munaakhel’anyu. Owo aahikhala ni Yoowo; owo aahisuwela wira Owo aari ani. Vano nto owo ohinatthi hata wuupuwela vanenli, Eroho Yowarya yaahinvara, nto owo khwira, “Nyuwo mwa Kristu, Mwaana a Muluku mukumi.”

⁹⁶ Khwira, “Nyuwo, ooreeriwa ti nyuwo Simoni, Simoni Bar-yona, maana kahiyo erutthu ni ephome ewuupululenleni. Khamwiixuntte ela ni teyoloxiyya a mutthu. Khamukhumme oseminaariyu ni yeeyo. Masi Atithi Aka Ari Wirimu t’awuupululenleni. Vamwala va, Miyo kinooteka-vo Ekerej’Aka, nto mikhora sa mookhwaani khasinwerya opwetexa Yeeyo.”

⁹⁷ Maasi pooti osarya, ni ikapwitthi s’atomu pooti omora, ni sothene, masi ole ori oolipa mwa Kristu onoowela vasulu va mwanamkhaya a atomu, siiso ntoko Nowe saamwiirihaly’awe mwanankhaya a mutaseke, olimpe-ene mukalawani. Muhiye waamini wanyu okele memmo, emaara emosa, moone etthu eniiraneya; vamwala woolipa wa Muluku, mwa ithoonyeryo. Muluku onnipaka ephiro y’ovuluwa, khula okathi. Owo ohaana opaka ephiro y’ovuluwa. Waphiya-ru okathi wootthuneya, Muluku ti Muluku...

⁹⁸ Yehova-yire! *Yehova-yire* enihimya, “Apwiya anoovaherya Mmansaya mukuttho,” tthiri Apwiya anookhaliha Mmansaya ephiro y’ovuluwa. Muluku onniwerya okhaliha okhala wira Owo ti Mpattuxa. Ni Muluku, emaara emosa wa mahiku othene, oKalvario! Amen! Vale, vale okathi Malaikha maalupale a Wirimu, okathi mapuro othene a axetwani yaathukumenly’aya, okathi elapo yaathukumenly’aya mwaha wo wuukhuleya ni khuttikinya mahiye, ni okathi nsuwa naaluwenly’aya ni niithomeyaly’aya iwe khurukunuwa khukhala epiphi, okathi mweeri ni itheneeri saattikinyeyi’aya khukhuma mapuro aya, ale oovuluxiwa a okathi wothene, ni moovirani w’okathi wothene animoorwa, anoosuwela ewoora eyo.

⁹⁹ Okathi Mwaana a Muluku okhwi’y’awe vale, aahimwaakha Satana ikuru sothene. Hata okhwa, ni omooroni, ni mahiye, ni woova wothene, saahimiriwa weiwe oKalvario. Okathi Owo olivaly’awe esisapo yuulupale ni okathi Mwaapwittipwitthi

okhwiy'awe, ni itampi saaheliw'aya vasulu Vawe, Owo aari namakuxa itampi, khuroiha omooroni sikhany'aya sa weiwo. Nto Muluku khimuhimuxa mmurotoni mwaya. Nto naaminiki yeeyo, ninnikhalihwi naxariya mwaha wo waamini, va mulipiheryo w'Ephome emwaraxiwe ya Pwiya Yesu Kristu. Amen. Muluku apakaka ephiro y'ovuluwa.

¹⁰⁰ Oh, munna, okathi munoon'anyu e... muniw'anyu ekaaro y'ampulansiya enyakulaka, khula okathi muniw'anyu emosa, nlo nthoonyeryo wira munrowa ephiro yeeyo. Khula okathi munivir'anyu omahiye, nlo nthoonyeryo. Munrowa ephiro yeeyo. Khula okathi ninnyaari ninkhum'aya wiitho, ni maihi ootweelela mmuruni, nlo nthoonyeryo. Munrowa ephiro yeeyo.

¹⁰¹ Khivanxankiha, nto, Paulo vaawery'awe ohimya, ni nrromelo w'eekhai wa mitathaari ni woolipa mwa yoowo, sa. Wulu! Okathi ophiyaly'awe wookiseryani w'ephiro, owo iirale, "Koowana ekhotto yooreera. Koomaliherya muteko aka. Koosuka waamini. Vano, koosukeriwa ekhara ya xariya, yeeyo Apwiya Anlamula ni xariya anthhun'aya okivaha nihiku nlo, kahi miyo paahi, masi othene ale aniphenta orwa Wawe."

¹⁰² Mwakhala muretta ni oowoceya ni makhalelo ala a khalayi, ni munaphenta orwa w'Apwiya Yesu vooreera ovikana simphent'anyu yolya anyu vameesa, wala amwaar'inyu, wala an'inyu, vano yookhala ekhara musukeriw'anyu. Kahi ekhara, ekhara ya weero wira nware mmuruni mwanu. Masi erutthu, ehirina owereya, e... ewarihiwe ekhara Movuwani mwa Muluku, ewarihiwe ekhara mw'ehikhwelo ya Yesu Kristu. Ti yeeyo esukeriw'anyu, yeeyo Apwiya, Mphuki a xariya anrow'aya woovahani nihiku nenlo. Nlo ti nihiku hiyo ninwehereryaahu. Muluku oompakela ephiro y'ovuluwa khula mmosa a hiyo. Veekhai Owo oopaka.

¹⁰³ Okathi profeta Daniyeli, mwaana a Muluku, aariheliw'awe mulittini mw'akharamu. Waahikhala okathi Daniyeli, ory'ene oororomeleya, aahul'awe icanela sawe ahoovaka etthu mwene aahimmy'awe. Nto okathi e... aanivekela, voohicala nlamulo xeeni naapakiwe, Daniyeli aanivekela nnakhala vo, okathi waaweh'awe oYerusalemu n'uvekela. Athu yaweha oYerusalemu n'uvekela, muttetthe waavahiwa-wo mukuttho woopahiwa... Tivo Daniyeli aaweh'awe epantt'ile n'uvekela, maana Apwiya yaarohimya wira, "Athu yakhalana muxankiho khula okathi, khuweha nipuro nla noowaarya, khuvekela, vano mwiiwe... Miyo kinimwiiwa Wirimu," okathi Salomoni aavaherenny'awe empa y'olompa.

¹⁰⁴ Mwaha wa yeeyo Yona aarin'awe waamini aarin'awe, okathi namalele a mphareya aarukurenry'awe exiko awe, ni ary'ene mmarapheyoni, mmirimani mwa nankumi, vathi moowiixani w'ephareya, ephareya ya mwanamkhaya. Owo iirale, "Iyo ithiru soowoottha. Masi kinooweha-tho empa Anyu yoowaarya,

Muluku.” Muluku aahiira etthu. Owo aahimpakela ephiro y’ovuluwa Yona. Etthu Owo iraly’awe, khaavo onsuwela. Eyo esiiri ya Muluku mwaneene.

¹⁰⁵ Masi, khivaacala nipuro xeeni vaary’aya voohiweryaneya, Muluku onniwerya—onniwerya orukunxa sookhumelela. Owo onniwerya okhaliha etthu yoohiweryaneya okhala yooweryeya. Ni kahi yooweryeya paahi, masi onniwerya okhaliha ekeekhai, okathi atthu animukux’aya Muluku mwa Masu Awe n’ukupali ephiro evaheriwe Muluku onvahenry’awe mutthu.

¹⁰⁶ Muluku aahiira etthu. Owo khino pooti aahenle eheema y’epheyo iwe. Nkisuwenle etthu Owo iraly’awe mmirimani mwa nankumi ule, masi Owo aahimukhaliha Yona mme mahiku mararu ni ohiyu, ntoko ethoonyeryo, wira Kristu aarowa okhala ahirina epheyo, mmirimani mw’etthaya, nto mmurotoni mwaya Owo aamukhuma-tho. Eyo yaari ethoonyeryo. Owo aahipaka ephiro y’ovuluwa. Owo okathi wothene onoopaka.

¹⁰⁷ Okathi Daniyeli aary’awe vale, nto akharamu erwaaka, emutthimakelaka, khiwaakhanle woova mmurimani mwa santu ule. Masi owo eemenle vale, ni Muluku khaamalinhe muteko n’uwo. Nto akharamu ehinatthi onvara, Nlaikha naahimwareya ohoolo waya, voohihoverya wira Waarya omosaru waamukhumelenle Saulo a oTarsu, arowaka oTamasiku.

¹⁰⁸ Waarya wuulupale waahaarya. Vano awo khuweha, vano khiyaasuwela etthu xeeni yaakhumelela. Nto Saulo aahimora vakhavaloni wawe. Vano Nsu nimos a khukhuma moWaaryani, niiraka, “Saulo, Saulo, munikilupatthelani?”

Khwira, “T’ani, Pwiya?”

Owo khwira, “Miy o, Yesu, munimulupatth’anyu.”

¹⁰⁹ Yaari aana aHeperi yaari oomuroromela natiri a Muluku, yaaphwanyaneya vale muttukutthani mwa mooro...ahiiso oPapilooniya, kiireke, erowaka muttukutthani mwa mooro. Nivalo nimos a eriyari y’awo ni okhwa.

¹¹⁰ Eyo ekhanle okhalaka sayi w’atthu va ohiy’ula. Pooti okhalaka nihiku nimos a eriyari ya nyuwo ni ovalaana Woohimala. Munrowa wira ethanlelo anyu vano. Enamuna evaheriw’aya wa nyuwo vakhala wira munookupali. “Nivalo nimos a,” Yonathani aahimuhimeerya Davidi, okathi waavurans’aya mu—mu—mura, “nivalo nimos a eriyari ya miyo ni okhwa.”

¹¹¹ Nto nivalo nimos a eriyari y’awo ni okhwa. Masi okathi ene yoowo woophaveleyaxa, Muluku aahivaherya ephiro y’ovuluwa, ni Owo aahimuruma muttukutthani mme mwa mooro Pwiya Yesu Kristu, khukhaliha moor’ole ottaiwene w’awo.

¹¹² Aari Enookhi, aahimye wira aaheetta ni Muluku iyaakha imiya thanu khukhalana onamoona wira “aahimusiveliha Muluku.” Owo aahaamini wira “khaarowa woona okhwa.”

Aawerya sayi Muluku wira? Khinaakhanle hata ntteeke mahiku ale, wira nimuteexe. Masi Muluku aahivaherya ephiro, okuxiwa, waamukunxe Enookhi okhuma vathi arowaka Movuwani, ahoonananne okhwa.

¹¹³ Aari Eliya aalapunwe ephareya yuulupale...kiireke Muro Yordani nihiku nle, akawanyaka epante emosa n'ekina. Nto okathi Eliya aary'awe oolikana wira arowe Wirimu, ahikhwiye, aari Muluku aamupakenle ephiro. Kahi ntteeke, masi Owo aaveleelinhe ekaarro ya Mooro, yeettihiwa n'ikhavalo sa Mooro. Muluku aahipaka ephiro, mwa minuutu yoowo, ephiro y'ovuluxiwa okhwa.

¹¹⁴ Aari Moise, kookupali, aatthanre aana a Isarayeli...kiireke aahonle yaawo, attharaka Waarya, Nlumi na Mooro, aviraka mothakoni. Aari Moise aavilenle mpakha wookiseryani. Aari Moise, iyaakha emiya ni miloko miili, nuvira iyaakha miloko mithanu na miraru amurumeelaka Muluku, eemenle vamwaako khuwehaweha muttethe wa natiri, maithori emoraka mmalakuni mwawe, a mulopwana mutokweene, a iyaakha emiya ni miloko miili. Owo aahivira mw'etotorosoni sa miiwa. Owo aahivira mmaasini moowiixa. Aahilawiha muhasa woowaawa, muhasa wa wamwe ni oxanka. Owo aahikhala n'atthu oohiwelela, ntoko makampusi aya. Owo aahaahoolela okhuma nipuro arowaka nipuro, ni ovilela iyaapelo saya. Ni aahiikhaliha v'ephakani, khwira, "Muluku, mukikuxe miyo muhinathi waakuxa awo."

¹¹⁵ Aari Moise eemenle vale, ntoko mutthu mutokweene, asuwelaka wira mwa khula enamuna owo aari ethoonyeryo ya Kristu, asuwelaka mwa enamuna emosa, enamuna emosa, wira Muluku vekeekhai aamurowa omukuxa, okhala wira Owo aahaana omuruuha emaara ekina, ntoko ethoonyeryo ya Kristu. Owo aayariwe ntoko profeta, ntoko Kristu. Ni kahi profeta paahi, masi muhooli, ni sikina. Owo aahiipitihwa muttheereni, nave siiso aahikuxiwa Kristu khurowaniwa wEjitu. Owo aari namavaha ikano, ntoko Kristu aary'awe vamwaako Olivera, yoowo aakhala okhuma oSinayi. Inamuna sothene, owo aari ethoonyeryo ya Kristu.

¹¹⁶ Nto okathi wuuluvanly'awe, vano okhwa omuwehaka wiitho, owo aarowa oruuha sayi ohihimuwa? Masi vaphiyaly'aya okathi woophaveleyaxa, Muluku aahipaka ephiro. Okathi omumula waakhum'aya, ni okhammwa vammilo vawe, owo aahiweha, ory'ene epante awe, nto vale waaphwanyaneya Mwala. Muluku aahivaha Mwala. Mwala aari Kristu Yesu yoole aari mothakoni. Moise aahivilela ni Mwala.

¹¹⁷ Muluku, akivahe mahala wira kivilele ni etthu emosaru. Nto okathi omumula w'ekumi aka onikumihw'aya mw'erutthu ila, akihiye koone Mwala weemenle-ene vale.

118 Aaheemela vasulu va Mwala, vano Malaikha khurwa khimukuxa. Iyaakha imiya thanu na tthaaru ohoolo waya, owo aaphwanyaneya oPalestina, ni Eliya, yeemelanse-ene vale elavulaka ni Yesu, mwiikimanyo ohinatthi. Muluku aahipaka ephiro y'ovuluwa.

119 Itthu piili suulupalexa sa Waataana Wa Khalayi, kinwery'aka wona mw'eprofeta, ivirikanelo piili suulupale, saari iya. Atthu yaawehererya okathi mpakha Mesiya aarow'awe orwa. Vano nto, varwiiy'awe Mesiya, awo yaawehererya okathi, Eroho Yowarya yaarow'aya orwa.

120 Vookiserya, m'okathi aya, ithoonyeryo sothene ottuli wu, awo yaarin'aya ni maprofeta ni sothene, ithoonyeryo sothene ni ilivelo awo yaarin'aya, vookiserya Mesiya aahirwa, nto yaahimaliheriwa okhala wira Muluku aahimnye siiso.

121 Vano awo khunawehererya okathi, wa "Ekereja yuulupale yoovuwa yaarowa ohikhalana nlepa wala ninnyaari," yaarowa waarya mulaponi ntoko ettheneeri. Awo yaawehererya okathi yoowo. Enrowa okhala sayi? Owo aahikhwa khuvira mahiku mararu othana n'uhiyu. Owo aahihimuwa. Aahaakhumelela atthu imiya thanu, ni aahiwela Wirimu. Owo aahaahiya vathi va, meekh'aya. Ekerej'ela yaarowa okhala sayi yoovuwa, Muhooli aya oronwe-ene? Muluku aahilaiherya Ekereja. Yaarowa okhala sayi Muthuko waarowa waarya vooপুরoni Vawe, Owo oronwe-ene?

122 Okathi Owo ohimaly'awe vale, "Woohala okathi vakhani, nto olumwenku khunrowa okoona; nave nyuwo munookoona, okhala wira Miyo kinookhala ni nyuwo, hata mwa nyuwo, mpakha omala olumwenku. Itthu Miyo sinvar'aka nave-tho nyuwo munoovara. Murowe mulaponi mothene mwalaleye Ehapari yooreera. Ithoonyeryo iya sinimwaatthara ale anrowa waamini."

123 Awo anwerya wira sayi, ni Kristu ohikhanle ni yaawo? Anwerya wira sayi, Muluku aavahale-ene natiri? Masi, nkawehani, Muluku aahinvaha pentekosite, okathi Eroho Yowarya, mwa Mutthu, yaakhuruwaly'aya nto khikuxa irutthu s'atthu anookhwa vaamanly'aya orapihiwa ni Elivelo ya Pwiya Yesu Kristu. Nto Eroho Yowarya yaanimukuxa mutth'uwu mwa mweettiheryo Aya eneene, ni omuruma orowa ni ithoonyeryo ni mitikiniho ni miiriirya saattharaka. Muluku aahivaherya ephiro. Awo khayaawerya wira mmansaya. Awo yaari atthu ntoko nyuwo ni miyo. Awo yaawerya sayi wira? Awo khayaawerya. Masi Muluku aahipaka ephiro y'ovuluwa.

124 Okathi yaaris'aya...?..empa y'osulu, awo yona wira atthu yaamwaatheya. Awo yona wira yaamukhala *ela*, *ele*, wala *ekina*. Awo yaarina icanela sothene soowaliwa, ni mikhora soowaliwa. Awo yaawerya wira sayi? Awo yaari anamoova. Awo khayaarina muthana. Awo yaarina nikhuva na mwalyakhu, nto kahi muthana w'ekeekhai wa Eroho Yowarya. Awo yaahiwalasa

mikhora. Awo yaanoovasa. Yaanuuliwa muru okhumela ota okumana n'athu. Yaarowa oweriya sayi wira?

¹²⁵ Masi Muluku aahimuveleliha pentekosite, opatiiso wa Eorho Yowarya. Naanaanoru yaahihula icanela ni mikhora, vano yaahirowasa mphironi. Muluku aahilaiherya. Muluku alaiherya vale, Muluku onoomaliherya Masu Awe. Owo onoopaka ephiro y'ovuluwa. Owo khonrowa otthuniherya nyuwo weereriwa ni etthu p'itthu Owo ohinrow'awe opaka ephiro wira nvuluwe. Owo onimwiira.

¹²⁶ Hiyo nri va, hiyo ninkhala nihiku nooriipela, na mahittette, n'epula. Ekereja eri nuusu muhina ni nuusu ota. Athu anootikinihiwa moota xeeni anwery'aya wira *ela*, ni moota xeeni anwery'aya? Awo khayaarina Waarya. Masi profeta aahihimya, "Onookhala Waarya okathi wa makaaripi." Enweryaneya sayi okhala? Hiyo ni... Ekereja nihiku nla, Ekereja yeeyo yoovuwa eri wira ekhale mulaponi mu, okathi Yesu onrw'awe wira aakhele Ekereja yoovuwa, ninaakhela epula yookiserya, oyeehiwa. Ipante piili sa Eroho Yowarya enoorwa mulaponi, ni enoomwareela khula elapo, ni mooro wa muhakalaliho onovarela mwa khula mwaako. oXiina, oJapawu, okhuma oKoreya, wAfrika wooriipela, ni mapuro othene, Eroho Yowarya enoomwaraxeliwa atthu. Muluku oopaka ephiro.

¹²⁷ Maitho aka yahoona avonihiwe sayi? Muluku aaroopaka ephiro. Aleluya! Ayo, mulopwana.

¹²⁸ Owo kweekwe onoopaka ephiro. Ni wa nyuwo va, muri mulaponi olelo, nyuwo munwehererya ohakalalihiwa, nyuwo mukhanle anawetta ni amalapo, mukhale ntoko Davidi.

¹²⁹ Davidi aarowa okhottoni. Owo khaarowa oosikula. Owo khaarowa ni nlepa nuusu-nuusu. Owo khaarowa uupuwelaka khino enimwiira yeeyo. Masi owo aaniwehererya mutakhwani mwa amooru mpakha, nuvira okathi vakhani, okhala omaaleya saana, ehiireyaka etthu. Nuvira okathi vakhani, ottaiwene saana, owo aaniwa makukhu opacerya, onyakula enyakulaka enyakulaka. Nuvira okathi vakhani, evekhulelo yuulupale y'epheyo yaanivira ohoolo wawe. Owo aanisuwela wira ole aari Muluku ni muttitthi wowaarya wa Malaikha yaakhala ohoolo wawe. Vano aanimukumihia xoow'awe n'ukela mukhottoni, n'umutthyawiha nwanani.

¹³⁰ Munna, muhituphe ni wupuwela etthu muhikhanle oolikana nlelo wira murowe. Nvenye! Nto moone wira kuhiyo wiitakanxa ekereja, kahi ovahana matata ni mulaleyi, nnakhala opatisiwa mmaasini. Masi onkhala okupali mukuttho ovaheriwe ni Muluku, Yesu Kristu, ntoko Mutthu mmurimani mwanyu. Eroho Yowarya enoorowa ohoolo wanyu, ntoko epheyo enoopa n'ikuru, ekumihaka khula etthu mphironi. Amen. Ti yeeyo. Vano, mukhale aKristu. Nyuwo muri mphironi, mukhale atthu animoova Muluku vekeekhai.

131 Onimoorwa muhakalaliho va, voohilokela, muthukumano muulupale wa muheemani. Kinniwerya woona. Khweli! Munthuna wira exeeni? Mwiseettihe mmansinyu. . .

132 Nno okathi uwo ovinre, ilapo s'okuusini, yaahikhala athu yaarowaka ni othuma ipottha, ni siiso. Erimwiiraneya tu omuupuwela wahal'ola. Yarowa vale, yaanithuma ipottha, yaanoona wira athu ale owooniha othunku yaahimaniwa. Awo waanaanana okhuma elapo aya, ni yaanisuwela wira khayaakhalakhala ahokolowaka. Athu Ooriipa, yaanooniha othunku moota siireliw'aya.

133 Nihiku nimosa aahooniwa mmiravo mmosa aarukunxenle makhata ottuli. Awo khayaarina ommana. Nnari, mulopwana. Mulipa-oothuma mmosa khurwa, khwira, "Mukihiye kithume epoth'ele."

Owo khwira, "Ole khontumihiwa."

134 Owo khwira, "Ahe, exeeni enimukhalihaxa oovirikana? Ole mukhulupale aale akina?"

Khwira, "Nnari."

135 Khwira, "Exeeni enimukhalihaxa oovirikana? Munonvaha yolya yooreerexa?"

Khwira, "Nnari. Owo onlya n'ale akina."

Khwira, "Exeeni enimukhalihaxa oovirikana?"

136 Khwira, "Kiroophiyerya osuwela wira atith'awe amwene a nihimo. Onamwi okhanle-ene elapo y'ottaiwene, owo nlelo onnirukunuwela ottuli. Owo mutthu oyariwe moomweneni. Atith'awe amwene. Onamwi ory'ene mmalapo, atith'awe amwene."

Atithi aka athaaciri a mampa ni muttethe,
Awo t'arina mihakhu sa mulaponi mmatatani
mw'Aya!
Sa arupi ni maluku oowaarya, ni eparatha ni
eweero,
Macucu Aya t'osarya, Awo arina mihakhu
sihinaalakeya.

137 Hiyo, athu va a etapernakulu ila, nookhalana eyooniheryo yoohivonyeya ya Pwiya Yesu ohihimunwe, ni muhakalaliho omwarene mulaponi; okhumaka nipuro no wiiveviha naamukhaani ntoko nla, noohivikana nikula na oPeteleheemu, ni alakela no wiivevihaxa. Masi mwa vaava, Muluku ooveleeliha muhakalaliho muulupale, owiihanne ikonto miloko soowaatta, ayo, mwa imilyawu, khwaakeliha Momweneni mwa Muluku.

138 Nyuwo munnitthuna okhala a muttethe mmosa ni hiyo? Moolikana ohiy'ula, natampi, wira muhiye ohicaliwa wanyu, muhiye makhalelo anyu a etampi? Nto mookole makhat'anyu mwiitakanxe nnikhuru nla n'anakhotto, n'athu aneetta

erowaka, yaaminiki wira Elevelo wa Pwiya Yesu Kristu enninirapiha itampi sothene.

Nivekele, nuuramihaka muru ahu.

¹³⁹ Tith'ihu ooreera murima a Wirimu, ohiy'ula, okathi onooweherery'ahuni Nyuwo, niwehereryaka Eroho Yowarya yuulupale ya Muluku eriyari y'alipa-oowiriyana va ni wira itthu voowaattaxa. Okhalaka wira niri oolikana vano, nihalelaka waakhela ekomunyawu, O Tithi Muluku, ninvekela wira Nyuwo mulavule ni mirima s'anatampi, ohiy'ula. Mwaahiye erwe, Pwiya, kahi vootthariha eyuukhuwelo, kahi vootthariha ehantisi yooriipiha murima, masi vekeekhai vootthariha Masu a Muluku oohihononiwa. "Wira Muluku oophentexa olumwenku, Owo onvaha Mwan'Awē mmose-ene, wira othene ale eni emwaamini Yoowo ehipweteye masi ekhalane Ekumi Ehinimala."

¹⁴⁰ Muluku, munivahe, ohiy'ula, wira Masu a Pwiya Yesu, mwa Yohani Oowaarya 5:24, evuwe mwa khula murima. "Ole oniwa Masu Aka ni onimwaamini Ole okirumme, ookhalana Ekumi ehinimala, ni kharowa olamuliwa, masi oovira mookhwaani khuphwanya Ekumi." Wira atthu anci-ene evire, okathi ula, okhuma mookhwaani ephwanye Ekumi, nilipelelaka Eroho Yowarya, mwa Nsina Yesu Kristu.

¹⁴¹ Vano muuramme-ne muru. Kintthuna kisuwele, munna oopaka, vakhala wira. . . Atthu othene, muKristu, evekelaka. Ookhala mulopwana, muthiyana, mmiravo, wala mwaaruusi, mwaarowa onvenxerya ntata Muluku? Kahi miyo. Ni wira, "Va yeela. . . Kinnivenxa ntata naka, wira kooleleni Nyuwo, Muluku, kinnaamini wira ehukhumu ehanle omana elapo. Nto miyo kiri vathi v'ehukhumu wo olamuliwa weno. Kihaana okhala oovalaaniwa ni Muluku, ohoolo w'Ekereja, ohoolo w'atthu aKristu. Kihaana ohaaxiwa voohimala, omooroni Ohinimala. Masi, ohiy'ula, kinnoona Eroho Anyu elavulaka ni miyo, wira kihaana okhala oothanliwa a Muluku. Maana, Yesu oohimya, 'Khaavo onwerya orwa wa Miyo, ehikhanle wira Atithi anoomuruuha.' Ni kinnoona ekuxeryo murima w'omeekha mmurimani mwaka, vano kinnimukupali Kristu ntoko Moopoli aka. Vano, Muluku, kinnoovenxeryani ntata naka Nyuwo, ni wira, wa yeela, vano kinnimukupali vano Mwan'Inyu, Yesu Kristu, mukuttho Anyu ovaheriwe, mwaha wa itampi saka sootakhala ni soohifayi. Vano kinnoovenxeryani matata Nyuwo." Munimwiira?

¹⁴² Mulopwana wala muthiyana, mmiravo wala mwaaruusi, mpaani mu, okathi ula, munoovenxa matata mwiire, "Mwa yeela, vano kinnimukupali Pwiya Yesu Kristu ntoko Moopoli aka." Nilipelelaka okathi wira mwiire ethanlelo anyu. Nvenxe ntata paahi. Muluku ooreeriheni, mwammiravo. Mutthu mukina nvenxe ntata, mwiire. . . Muluku ooreeriheni munn'aka. Vaareera. Munimwiirela Muluku, kahi miyo.

143 “Othene ale yaamini yaanipatisiwa, ni yaanincerereya mukereja.” Atthu ikonto tthaaru yaahoopowa.

Yookhala ephattuwelo yoosareya Ephome.

144 Vekeekhai. Munoopwina vano, ni waamini, mwiiraka, “Pwiya Muluku, vano kinimwiitaphula. Oh, koorowa waltaari, imaara sinci-ene. Kihiiira *ela, ele*, wala kihitakanxa mukereja. Koophavela otthyawa oviruwa. Masi, ohiy’ula, kinoorwa enamuna yeela, vasulu va mulipiheryo wa Yesu Kristu okikhwenle, Owo aari Mwaapwittipwitthi a mukuttho. Owo aari epuri ya ovuluwa. Owo aari sothene. Ni, mwa Yoowo, miyo kinnimalela. Owo ookuxa itampi saka. Owo ookhala vooপুরoni vaka oKalvario. Owo ookhala vooপুরoni vaka vathi va oviruwa wa Muluku. Owo ookhala vooপুরoni vaka vathi va ehukhumu ya Muluku. Owo ookhala vooপুরoni vaka omooroni. Nto wira miyo kikhale vooপুরoni Vawe Wirimu, wira kikhale mwaana a Muluku, vano kinnikupali mulipiheryo yoowo vano. Ntoko natampi, kinnaamini.” [Nipuro vahiitthu mufiitani—Mol.]

Okathi anatampi ampwin’aya vathi v’Ephome,
Annapweteya malepa aya othene oottheka.
Annaapweteya othene . . .

145 Mukhale nvekelaka, ekereja, okathi mutthu onii’awe ethanlelo w’Apwiya. Nvekele. Anaapweteya makavi? Malep’aya othene oottheka. muYuta, Mmalapo, epottha wala ootaphuwa, natampi wala mutthu a mukereja, namukuttho, tothoro, mulapeli, munakhaleru etthu p’itthu, animoopweteyani malep’anyu othene oottheka, mwaha wo omwaamini Pwiya Yesu, omukupali Yoowo ntoko Moopoli. Nwiriyanane eversu ila, okathi onii’ahu voomaaleleya vano.

Nawiiye ooluwela aahitthapa woona
Ephattuwelo eyo . . .

146 Woomalelani w’ephiro, miroromelo sothene saahirowa, yaahikhumelela Ephattuwelo. Muri woomalelani, ohiy’ula, wa otthuna wanyu?

Anatampi apwinne vathi . . .
Annaapweteya malep’aya othene oottheka.
Annaapweteya malep’aya othene oottheka,
Annaapweteya . . .

147 Vano, Tithi a Wirimu, sothene siri mmatatani mw’Anyu. Mulopwana mutokweene ni mwammiravo aavenxa matat’aya, wira yaathuna ewaakheleni Nyuwo, okathi Ephattuwelo etthukuliw’aya ni Masu. Hiyo ninnixukhurela opatthana Wanyu, Pwiya, Eroho Yowarya.

148 Khino othene aya t’aKristu, othene oolipa. Nyuwo munnisuwela mirima saya, Pwiya. Siiso awo etumphe-ene mukaano wa ikharari ni ehukhumu, ehittthunaka-tho ovenxa ntata naya, wala ehittthunaka-tho okhalana hata moonelo wira

Nyuwo munoowitthana. Miyo kinnivekela, Tithi, eyo yakhala t'itthu ene, mukhale oomoriwa ikharari.

¹⁴⁹ Muluku, kinvekela wira mmoopole mulopwan'ola, Pwiya. Kinvekela wira naanaano va, muhina mmurimani mwawe, isiinu sa ohakalala sa Wirimu sinooruma. Ni mwammirav'owo, enamuna emosaru. Nisuwelaka ela, wira Yesu oohimya nuulumo nla, "Ole oniiwa Masu Aka, onimwaamini Ole okirumme, ookhalana Ekumi ehinimala, nto khonrowa ohukhummwa, masi oovira mookhwaani khuphwanya Ekumi." Awo ti Masu Anyu, Tithi, ni hiyo ninnaamini Yaawo. Mwaavahe ohakalala woohimala vano, okhala wira aakupali Ekumi ehinimala. Ninnivekela, wira mukhalihe makhalelo aya oosareya ohakalala, ni oowiima mihokorokho ni ootthapa. Munivahe, Pwiya.

¹⁵⁰ Mwaareerihe akina, okathi onooweherery'ahuni Nyuwo, mwa Nsina na Yesu. Amen.



OTTHUKULA EPHIRO EMK56-0304
(Making A Way)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeetaka 4 mweeri wa Março 1956, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org